

欽定剿平三省邪匪方略

欽定剿平三省邪匪方略正編卷二百二十五

庚申年

十二月二十日

戊辰

額勒登保奏言竊

臣

昨督師

由藍田至商州截剿竄匪維時冉學勝股匪已

由土門一帶奔竄楊遇春格布舍穆克登布由

商雒鎮龍駒寨等處截剿該匪等晝夜於山僻

小路分股疾走連日風雪甚大我兵衝冒儼行

初七日未刻至新開嶺探報橋兒溝有步行賊

匪千餘人結隊竄來有出武關之勢楊遇春等  
卽挑帶馬步健壯官兵飛速趕往溝口正值該  
匪自溝內竄來先有騎馬賊一人頭戴翎頂領  
路一見我兵卽率衆抗拒穆克登布先帶馬兵  
數騎直前射死斷其首級梟示餘衆潰折我兵  
乘勢進溝追殺斃賊二百餘名生擒數十名所  
有新近被脅民人乘間逃出者不少楊遇春等

察看賊匪內步行者居多恐騎馬賊匪已從別路繞向武關遂商令格布舍穆克登布帶兵追殺敗竄之賊陽遇春豐紳帶兵趕至武關擊營堵截時已昏暮追殺十餘里溝狹林深風雪不止賊匪翻越大山向戴家河而遁穆克登布等二更時亦至武關與楊遇春會合期於併力剿堵甫在壑營據報離武關四五里之涼水灣有

騎馬賊匪竄來楊遇春等立即率領馬隊官兵  
迎截該匪始猶衝突我兵鎗箭並發賊匪墜馬  
者數人旋即敗竄我兵於雪光中縱馬追殺十  
餘里沿途約斃賊百餘名生擒三十餘人奪獲  
騾馬百餘匹至三更時暫行收兵訊據獲犯供  
稱日間殺斃戴翎頂之賊係偽先鋒彭副帥並  
稱冉學勝與樊人傑等商定留樊人傑王士虎

冉添泗等在後綴住官兵冉學勝帶領賊衆先  
向商南一帶開路出武關徑往河南俟官兵追  
至豫省樊人傑再乘間由商雒東去如遇河南  
邊境堵截嚴密卽入楚境近日分爲馬步二隊  
連夜奔走今日原想到武關劄營不料官兵迎  
頭殺來等語該匪等奸猾已極楊遇春等當將  
所獲之賊悉行正法次日未刻該匪竄至太吉

河適綸布春汪啟等帶兵趕至賊匪一見官兵  
卽向太溝太字坪紛紛亂竄綸布春汪啟與副  
將富蘭分爲三路追殺四十餘里擒斬二百餘  
人賊匪竄向梁家墳楊遇春等於晚間偵知恐  
賊繞路仍行東走初九日楊遇春等覓路抄往  
普峪河初十日又抄往荆子關賊匪知到處有  
兵遂不敢東向

臣

疊據楊遇春等具報計料賊

匪旣不能東竄或由鄖西邊界向西折奔山陽而逃遂帶同札克塔爾桑吉斯塔爾等出液村勞峪口劉家莊緊顧東北而進十三日抵山陽之桃園子查得十一二等日給布春汪啟等又於馬家坪天竺山魚洞河柳山坡老溝等處連次追及賊匪帶兵奮擊又斃賊二百餘人賊之滾崖跌斃拋擲器械者甚多奪獲騾馬二百餘



頭現在賊匪有過狐嶺逃向板巖黃龍廟者係

在山陽西南有逃向下關房黑山西溝腦者係

在山陽西北臣仍飭知楊遇春等緊扼東南而

前并派綸布春汪啟等仍帶兵刻卽趕剿敗竄

之賊務期乘勝上緊剿淨至樊人傑王士虎股

匪前經臣率同札克塔爾等於金嶺川截剿之

後仍由山陽九里坪等處折竄臣曾派令都司

朱集才帶有兵勇數百餘名尾隨察其所向酌  
量剿辦茲據署鎮安令胡彬稟報賊匪於初七  
日竄至縣屬之午峪溝有賊百餘人直抵距城  
不遠之王家坪放火燒燬民房防守鎮安之遊  
擊廣亮率同千把外委等帶兵出擊不料大股  
賊匪從午峪溝竄出廣亮被圍力戰手刃二賊  
受傷陣亡千總年登亦被戕害該署令胡彬復

會司營弁率領壯勇出城策應千總賈夢能把  
總戴君禮均各受傷該匪於夜間直趨城下圍  
撲胡彬等率領兵勇用鎗礮轟擊都司朱集才  
等復一路揚言臣帶領大兵已到次日該匪遂  
從紙橋溝一帶向西奔竄所有傷亡兵勇另行  
查報查各該匪分股竄擾蓄意東向此次冉學  
勝等將及武關已近豫境仰仗

天威楊遇春格布舍穆克登布豐紳等帶兵星飛速  
剿綸布春汪敗富蘭等又疊次截殺已將各該  
匪逼向西南且擒斬多人賊勢大挫但尚未擒  
獲首逆并立時辦竣一股無以仰慰

聖懷

臣

愧懼之餘倍深焦灼兼之兩旬以來各路兵

勇於深山冰雪中隨處奮力剿賊實無不備形

勞瘁

臣

一面獎賞一面整齊兵力鼓勵將領等

仍顧定東北加緊向西南剿辦再

臣欽奉

諭旨伍懷志股匪經官兵剿殺不過二百餘人乃以

萬餘官兵剿辦多日未能殲盡令

臣

查明叅奏

查總兵汪啟帶兵二千二百餘名前本在石泉

銀杏壩兜截伍懷志股匪東竄之路因冉學勝

竄過漢江慶成酌派綸布春由洋縣過江帶領

馬步官兵一千一百餘名追剿旋與汪啟合爲

一路併力剿辦該匪竄至留壩地方有西去之  
勢綸布春汪啟率兵於玉皇廟等處打仗殺賊  
將賊截回

臣

旋飭由鎮安山陽一帶追剿現又

疊次獲勝將冉學勝股匪逼折西南均能出力  
實無紆緩逗遛情事至穆克登布桑吉斯塔爾  
前與阿哈保等留甘剿辦伍逆餘匪自伍金柱  
殲斃之後該匪伍懷志等人數尙有一千餘衆

查經穆克登布在甘擒斬爲數日滅該匪遁入  
南山零星潛匿穆克登布輾轉搜捕亦頻有斬  
獲但賊蹤飄忽南山一帶又屬非常險阻凡遇  
山林叢雜澗谷幽深之處無論馬不能行卽步  
兵亦艱於進取兼之該匪數十爲羣出沒無定  
官兵旣不能緊躡其後又無路抄截其前甚至  
幽僻處所或竟難覓賊之所向且臣先以賊匪

有竄川省者又令阿哈保分帶馬步官兵二千  
餘名入川協剿而雒昂鄉勇三千名又經長麟  
調去故穆克登布桑吉斯塔爾等一路兵勇存  
有二千餘名亦不甚厚穆克登布桑吉斯塔爾  
有時與將備等率兵終日步行剿洗迨至菜子  
坪等處僅存賊匪二百餘人正與張鳳分帶兵  
勇另路抄剿乃冉學勝股匪突然竄至四畝地



穆克登布桑吉斯塔爾等只得盡力合剿現在  
之賊此時桑吉斯塔爾在臣處帶兵穆克登布

與楊遇春一路業將冉學勝股匪加緊截剿不

能東趨亦甚得濟是穆克登布桑吉斯塔爾二

人未能將伍懷志餘孽殲盡誠以賊匪詭譎又

限於地勢實非有意遷延且穆克登布隨同臣

數載勇往可靠實非敢於取巧之人至慶溥溫

承惠向在平利安康境內防剿賊匪屢有斬獲

臣

昨因川陝楚谷賊匪時時往來平利安康一

帶添派喜明馬玉魁二人帶廣東兵一千餘名

前往協力堵剿又緣平利安康在在與川楚交

錯山勢綿亘四五百里兵勇不能甚多亦難責

慶溥等分段堵禦是以只令相機截剿前據來

稟慶溥於泰山廟獅子壩等處疊次截賊喜明

馬玉魁溫承惠率領兵勇於孟石嶺大黃坪白  
土關八卦廟化龍山九個包一帶攔截所有徐  
添德股匪由巴山線河盤陀溝一帶希冀東奔  
喜明等率領兵勇分路截剿斃賊多人而龍紹  
周苟文明以及黃號各股探聞又向東奔喜明  
與溫承惠又須堵截大股東趨之路適徐添德  
股匪由釘耙溝竄入竹谿且稱該匪先係分出

數百人偷撲營卡而其大夥卽從老林乘夜竄  
出釘耙溝賊之詭詐真堪髮指并據竹谿縣郭  
淵極稟報溫承惠派令守備王英在黃栢墳帶  
領鄉勇用鎗礮轟擊徐添德賊匪多人是喜明  
馬玉魁溫承惠之不能深追徐添德股匪者自  
以龍紹周等股牽綴之故目下慶溥一員又經  
臣派往城洋一帶接管關騰所領官兵防堵漢

江北岸

臣

又嚴札喜明馬玉魁溫承惠等實力

堵剿龍苟各股賊匪緊顧東北不得再有疎失  
致賊又竄楚疆自取嚴譴是各該員從前情節  
均有不同當此

聖心盼捷孔殷之際該員等不能迅速剿盡賊匪固  
有應得之咎然統核該員等之堵剿情形尙屬  
不遺餘力究與前此疎防各員有間惟有仰懇

皇上格外天恩均請免查議臣現已將欽奉

諭旨節錄剴切宣示各該員自必益知警惕倍加愧

奮趕緊立功自贖今後倘有貽誤臣必奏明從

重治罪至竄楚之徐添德股匪臣已札知長齡

倭什布等上緊趕辦臣俟南山之賊辦有頭緒

再行酌量分兵兼顧奏入

上命軍機大臣傳諭額勒登保曰此次冉學勝等股

賊匪竄近武關蓄意欲往豫省經額勒登保派令  
楊遇春等衝寒冒雪疊次剿殺多名緊顧東面使  
賊匪不能逼近豫楚邊界截回西竄實屬不辭勞  
瘁伊等如此出力朕亦不忍再爲督飭惟自恨德  
薄才疎五年之久不能平此逆匪實深愧悚之至  
至賊匪經過處所並未見該地方官率領兵勇隨  
處接應惟賊匪竄近鎮安縣屬該署縣胡彬會同

營弁出城策應而遊擊廣亮及千把外委已受傷  
陣亡其餘竄過地方如入無人之所豈賊匪飛行  
絕迹竟不經由州縣境地乎又覆奏查明綸布春  
喜明等尙無遷延逗遛情事均請免查議一節綸  
布春等旣係躡蹤剿賊並未疎縱亦不必再加責  
備惟賊匪奔竄靡常總由陝省地方官不肯出力  
攔截實堪憤恨已另降旨將長麟陸有仁嚴行申



飭矣並著額勒登保查明陝省地方官如有仍前  
疎懈不能實力防堵之員其職分較大者據實叅  
奏其職分較小者一面摘去頂戴一面奏聞請旨  
俾各知悚惕不可稍事姑容現在賊匪既經敗竄  
額勒登保務當乘此勝勢堅持初見將漢江以北  
冉樊等逆剿辦淨盡卽萬不得已亦當逼過南岸  
驅令入川較易集事至冉學勝等既雖向西奔但

賊情詭詐多端恐乘間竄出峪口擾及西同鳳一  
帶完善之區關係非小尤當預爲防範額勒登保  
現檄調慶溥赴漢江北岸防堵慶溥當卽前往城  
洋一帶並未停留自應如此倘有不遵經畧調遣  
者著額勒登保卽行嚴叅治罪以重事權再溫承  
惠雖在平利一帶督率鄉勇究未經歷戎行不過  
紮營防堵若該處可無需伊在彼藩司大員未便

久離任所卽令其回省辦理地方事務尙必須伊  
帶領兵勇防禦亦不必遽令回省也茲賞給額勒  
登保御書福字一個遙祝經畧與員弁兵民等共  
迓春祺大功速戴又賞給額勒登保墨刻御製邪  
教說一分俾伊等共知朕意祇誅叛逆亂民其誦  
習經文安分守法者斷不肯稍事株連也所有打  
仗陣亡之遊擊廣亮千總年登俱著咨部賜卹

上又命軍機大臣傳諭長麟陸有仁曰額勒登保奏  
報截剿東竄賊匪逼回西南未令竄近豫楚連日  
月雪進兵不遺餘力而沿途並未見有該地方官  
率領防守兵勇出卡迎截惟賊匪竄近鎮安縣城  
時有該署令胡彬會同營弁出城策應其餘奔竄  
地方竟如入無人之境現在額勒登保查明伍懷  
志股匪未能剿盡及徐添德竄往楚省綸布春喜

明等尙無延緩逗遛情事自不得歸咎伊等而陝  
省地方官總未出力防堵實堪痛恨長麟身任陝  
甘總督地方遇有賊匪剿辦是其專責所有帶兵  
各大員等乃係派往會同剿辦者長麟不知剿賊  
爲伊分內之事覲顏統轄兩省恃有經畧在彼督  
辦遂爾置身事外於一切軍務賊情心存膜視惟  
借防堵爲詞其實賊來仍不能堵禦是長麟竟與

防守偏裨無異且額勒登保摺內於漢江南岸賊  
匪情形並未提及白係未經接據該處地方官稟  
報是長麟既不隨時具奏又不咨明經畧任意玩  
延實屬大負委任至陸有仁在京時於朕前論及  
陝省剿賊之事頗覺振奮有爲朕以伊曾任西安  
藩司熟悉該處地方情形特授陝西巡撫乃伊到  
任後屢次奏報並未見別有籌畫整飭地方伊係

文員雖不責以帶兵剿賊而於該省賊匪出沒處所及地方官如何防守皆應實力查訪隨時整飭若徒以辦理糧餉卽爲盡職如前此派往川省專司軍需之廣興托津者然亦去用此巡撫爲耶試思川省地方團勇築堡極爲認真竄匪無從掠食不能久住卽昨據德楞泰勒保奏竄匪經過巴州龍角寨登高寨經寨首杜國學等出寨截殺多有

斬獲可見川省地方官辦理團勇堡寨之得力而  
陝省則從無此事豈川省官民皆知急公而陝省  
竟全不曉大義耶總由督撫等不肯實心理事一  
任地方官民泄泄沓沓賊來不知所自賊去不知  
所向伊等不能悉力堵禦豈竟不派人偵探預爲  
防範乎似此渙散懈弛專恃一二帶兵大員代爲  
肅清地方何時始能肅事且伊等身爲疆吏堵剿



二事責無旁貸乃剿賊旣委之於人而堵禦又未見實效任賊往來自如地方官毫無防備接應長麟陸有仁所辦何事俱著嚴行申飭在伊等之意以大功告竣地方官不過隨同議叙卽蕝事稍遲亦係衆人之過不思與經畧同心併力奮勉圖功若似此居心則非特妬忌額勒登保成功竟欲阻撓軍國重事天良何在長麟身係覺羅尤不應如

此現在防江之事有慶成在彼督率防禦長麟自  
應於西南一帶卡隘周歷巡防況據額勒登保奏  
冉學勝等股截向西竄賊匪詭詐或思逸出峪口  
竄近西同鳳一帶所關非細省城止有台斐音一  
人長麟亦當相機兼顧斷不可仍駐江岸以致顧  
此遺彼至溫承惠係陝省藩司在平利安康駐紮  
賊至則帶兵堵禦賊去則仍然安坐伊係文員亦

未必能臨陣殺賊並著長麟酌量是否必需溫承  
惠在彼駐守若無需該員在彼卽令其回省辦事  
再甘肅省城僅有姜開陽一人藩司廣厚現在何  
處何以未見長麟提及豈任其日久在邊境閒住  
乎此等教匪不過內地亂民地方官果能實心出  
力何患不事半功倍前經降旨責成各督撫不令  
他省之賊竄入本境而本境之賊亦不許逸入他

省違者治罪乃陝省地方官屢任賊匪闖入毫無  
攔阻誅之實不勝誅今再爲申諭該省地方官實  
力防堵勸令居民團勇築寨毋令賊匪任意往來  
俾經畧等在陝境辦淨各股賊匪計此旨到時已  
屆春令長麟等務當消除舊習振作奮勉總期於  
春令內一律肅功以贖前愆而膺懋賞並著長麟  
陸有仁將以上指出各情節據實明白廻奏如別

有難辦掣肘之處已節次降旨詢問伊更無所用  
其顧慮若再不據實直陳含混塞責或仍前延玩  
蔽績無期必當從重治罪不忍令全陝赤子死亡  
相繼也凜之慎之

二十二日庚午長麟慶成奏言臣等前將南鄭境

內零星賊匪逼回川境并截擊高馬等大股賊

匪逼向南趨未致竄越漢江嗣臣長麟接據各

卡探報前在龍池子截回之賊自羅柴山連夜  
拔營竄遁後已奔入儀隴巴州一帶其廣元境  
內各股賊匪仍在邊界游奕時有零星賊匪向  
各卡隘窺伺滋擾臣長麟卽派令佐領和興額  
叅將張應魁羅全亮等帶領馬步兵勇駐紮寧  
羌境內探有賊匪前來窺伺卽帶兵出卡迎擊  
去後嗣據和興額等稟報初四日有賊匪一股

由老關坪竄至毛壩河一帶又有一股於初五日由李家壩竄入棉子壩一帶均距荷葉嶺卡隘不遠和興額與張應魁羅全亮等分帶兵勇前往截剿甫經出卡賊匪遙見官兵並不接仗輒卽折回奔竄其卡隘以外處處老林叢密斷續直連川界該匪等卽由老林穿越潛逃遁歸川境又據總兵楊奎猷稟稱賊匪一股於初三

日竄近元壩子一帶分投覓伺卡隘楊奎猷帶兵出擊賊匪亦卽折回亡命狂奔楊奎猷驅兵追殺殲斃賊匪數人餘匪仍遁入老林潛逸又張世龍賊匪一股自廣元鸚哥嘴竄來初十日

至陝境八廟河經派防麥子坪卡隘遊擊王興

朝率領兵勇前往截擊賊匪旋卽折回時至四

更賊匪忽分三股直至麥子坪攻撲營卡因月



落天黑官兵不辨賊數多寡恐至衝失卡隘卽  
於卡內施放鎗礮并擲石滾木擊斃賊匪數人  
陣亡官兵一名賊匪猶抵死攻撲並不少退相  
持半夜直至黎明王興朝帶領兵勇由卡內衝  
出分兵左右鎗礮齊施又斃賊匪數人賊匪因  
見官兵勢猛始行敗走仍由八廟河竄回廣元  
蔡家坪當王興朝出卡攬殺之際有官兵三名

衝入賊隊賊退未見回營是否裏去或已被戕  
害另行查明報部十三日該匪又向附近寧羌  
州屬之流沙坡奔突經該處守卡鄉勇壘石擊  
打該匪又翻青草塘下關平溝折向川界趙墳  
河一帶查刻下賊匪形勢日就窮蹙而賊情更  
覺狡獪日間藏匿深林毫無蹤跡黑夜則分夥  
肆出各處搶掠名曰摸樁并有裝扮貿易客商

難民乞丐混跡過卡者均經隨時盤獲送營審辦是現在防堵事宜較前更當嚴密

臣

長麟當

卽嚴飭各卡晝夜加意隄防斷不可以賊勢敗

殘稍涉疎懈至

臣

慶成自截剿高馬等賊匪後

恐該匪仍圖搶過漢江卽暫在茶鎮一帶照料

江岸初六日接據探報東南一股賊匪不知姓

名由小河口田家壩至紅椿壩焚掠適總兵胡

定泰奉經畧派令帶兵前來漢江南岸防堵行  
抵茶鎮邑慶成當卽令胡定泰星夜馳往迎擊  
及趕抵王黑壩該匪聞知官兵信息卽由原路  
奔回又唐明萬一股賊匪由通江竄入陝境自  
盤龍河大茅坡一帶沿河繞竄小祥壩滋擾經  
防卡兵勇用鎗礮并滾木壘石擊打未被衝突  
該匪於初九日折竄星子山均未深入又據探

報一股賊匪由通江之絲蘿壩竄入陝境九元  
關羊峪溝一帶翻山竄至西鄉之紅花坪被卡  
隘兵勇嚴堵該匪於初八日繞竄川陝交界之  
三溪口有西竄簡池壩之勢查該處西通大池  
壩楊柳山峽口等處可達過江之路現已專差  
偵探確蹤并飛飭各營卡嚴備以便截擊又  
等接副都統額爾亨額來信由川省竄來一股

臣

賊匪未知係何賊目從紫陽盤香河直奔洞河  
口岸於前月二十九日夜間詐稱官兵隔岸喚  
渡被防江叅領佟湛色克圖等識破施放鎗礮  
擊斃賊匪數人賊匪折回金山梁深溝等處滋  
擾至初二日該匪復乘雪夜突至瓦房店江岸  
亦經叅將圖興阿等督兵施放連環鎗礮賊匪  
於對岸抵拒不退至黎明始行逃遁現已東竄

安康境內又接藩司溫承惠來稟徐添德股匪  
竄孟石嶺與黃號之賊合夥由黃栢墳一路竄  
走溫承惠派守備王英等挑帶鄉勇迎往截剿  
至石砦河地方正遇賊隊蜂擁東趨王英督率  
鄉勇奮力衝殺將賊匪截爲兩段黃號之賊折  
入文彩溝內青號徐添德一股仍向東奔鄉勇  
鎗礮並施擊斃賊匪三百餘人騎馬賊五人奪

獲旗幟器械騾馬甚多投出安康平利洵陽白  
河紫陽等處附近居民四百餘人賊匪捨命狂  
奔鄉勇趕緊追剿又斃賊匪一百五六十人餘  
匪竄往楚省之添扒地方溫承惠卽派令王英  
帶領鄉勇前往抄截其青號賊匪已由文彩溝  
折竄安康之滔河一帶與龍紹周苟文明等逆  
合夥屯聚慶溥喜明馬玉魁溫承惠等正在籌



剿適革職總兵柯藩趕到卽日由四季河入山  
躡明路徑合力攻剿各等語至漢江北岸之再  
學勝樊人傑等股賊匪先後由寧陝廳東奔楊  
遇春穆克登布在喬家溝截殺殲斃賊匪數百  
人該匪等分股由冷水溝柿園溝一帶竄至孝  
義廳城下該處城垣業已修築完竣署孝義廳  
候補知縣孫奇率領兵勇堵擊殺賊二十餘人

生擒二名餘匪連夜由舊縣關東奔山陽縣境  
賊探直至山陽城下經該縣督同鄉勇施放鎗  
礮賊匪未敢稍停卽由縣東出高壩店竹林關  
一帶奔逸適額勒登保已由藍田趕至商州楊  
遇春穆克登布等亦經趕至龍駒寨均已抄出  
賊匪東面迎頭攔截不致竄入豫境頃又據鎮  
安縣稟報樊逆賊匪於初七日由九里坪折回

縣屬午峪溝屯聚賊探百餘人直抵王家坪遊  
擊廣亮帶領弁兵前往迎擊該署縣胡彬亦帶  
領鄉勇出城策應行抵王家坪不期大股賊匪  
從午峪溝突出將廣亮圍困廣亮奮力衝突手  
刃執旗賊目二人因寡不敵衆與千總年登力  
戰陣亡該縣帶領鄉勇趕往救援殺斃賊匪十  
餘名賊始解圍該縣乘勢搶出廣亮等屍身因

城內空虛卽回城防守該匪復來攻撲城池該  
縣率領壯勇施放鎗礮斃賊七人相持竟夜至  
初八日黎明該匪始由紙橋溝一帶奔逸等語  
是樊逆賊股已自東面折向西奔距豫省邊界  
已遠其伍懷志餘匪前亦由柿園溝一路東竄  
現至甘家碛一帶仍在寧陝境內俟續得剿辦  
情形另行奏

聞

同日陸有仁奏言

臣

查現在軍需餉項仰蒙

皇上隨時撥發茲據署藩司台斐音稟稱本年陝省  
秋冬二季應發各營例餉因六七八等月軍餉  
不敷借動銀六十二萬數千兩今就其中尙可  
稍緩營分請俟來春再發外通計現在必須銀  
三十萬兩此時軍營需餉浩繁勢不能歸還例

餉應請於附近省分暫爲借撥

臣

覆加查核司

庫別無存項可以通融所撥山東江西山西廣東等省軍需餉銀一百萬兩雖年底明春俱可陸續到陝而各路軍營兵勇鹽菜口糧及一切買糧運費等項俱係設法先行墊辦餉到補發已不免前缺後空合無仰懇

聖恩俯准於河南藩庫暫借撥銀三十萬兩以應陝

省急需俟來年麥熟後徵收錢糧再爲酌解歸  
欵均奏入

上命軍機大臣傳諭長麟陸有仁慶成臣長麟自本  
月初八日到報後將及半月茲遞到六百里奏報  
朕以爲必係殺賊得有勝仗及披閱摺內所奏情  
形僅係照常防堵雖將川境竄匪截回並未痛殲  
賊衆且張世龍一股賊匪於夜間攻撲營卡官兵

不辨賊數多寡卽於卡內施放鎗礮相持半夜直至黎明遊擊王興朝帶領兵勇由卡內衝出祇斃賊數人官兵轉失去三名陣亡一名而摺內尙稱官兵勢猛賊匪敗走試思官兵僅殺賊數名有何勢猛尙覩顏爲此奏乎據稱賊匪日間藏匿深林黑夜分夥肆出摸樁並有裝扮貿易客商難民乞丐混迹過卡等語賊匪晝伏夜動自係日就窮蹙



但官兵日間既須防守卡隘夜間又被賊匪攻撲  
營卡晝夜不能安息豈不疲我兵力中賊詭計况  
黑夜中不辨賊之多寡施放鎗礮虛糜火藥更屬  
不值此等殘敗餘匪寧向不思設法上緊剿淨轉  
令其分夥更番肆擾耶似此防堵情形長麟慶成  
早應隨時具奏何必遲至半月致朕朝夕焦慮殊  
不體貼矣其所稱漢江以北剿辦冉學勝樊人傑

等股情形業經經畧奏聞而經畧昨奏並未提及  
漢江南岸剿賊之事可見長麟慶成一路剿辦多  
日不過殺賊數人故經畧摺內亦不值叙入試思  
辦理教匪已及五年倘再事遷延何日始能剿盡  
經畧及帶兵大員俱能認真剿賊不遺餘力早應  
悉就蕩平皆由督撫等不能督飭地方文武實力  
防範有剿無堵以致賊匪東奔西竄來往自如長

麟身係總督若僅株守江岸與帶兵偏裨何異然  
朕亦不令伊徒事奔逐總須將籌辦陝境各股竄  
匪情形通盤計畫佈置妥協方不致顧此遺彼乃  
藉防堵爲詞將辦賊大局置之度外而陸有仁則  
專以辦糧請餉爲事此外亦毫無籌策長麟陸有  
仁均著嚴行申飭此時惟有責成該督撫督率各  
府州縣於所管境內結寨團勇認真堵禦如府州

縣內有能出力防守著有勞績者該督撫卽據實保奏朕必不次陞擢但不可稍有徇私其團勇內有能殺賊立功者亦著地方官報明督撫具奏朕亦必格外加恩分別獎勵使官民聯爲一氣而督撫與帶兵大員互相策應併力一心何患不尅期蕲事此時長麟等惟有使川楚之賊不能竄入陝境漢江南岸之賊不令越過江北其江北賊匪竄

近南岸者勿又逼回總在川之北漢之南將賊匪  
奮力殲擒一鼓殄滅卽萬不得已亦須逼令入川  
剿辦較易集事現在川省團勇築堡極爲認真陝  
省地方瘠薄卽不如川省之富庶長麟等亦當設  
法辦理焉有束手無策一任地方官民泄泄沓沓  
乎曰下已交春令若遲至明年三月尙稽歲事卽  
墾墾清野之計亦不能行彼時若不令民乘時耕

種賊匪固無從掠食而百姓先已饑困若令其照  
舊耕作則青苗在地徒齎盜糧賊匪多一日滋擾  
則百姓多一日荼毒而虛糜糧餉寧有已時此旨  
到日著將陝省如何鼓勵官民嚴密佈置使賊匪  
到處不能搶掠裹脅早就殄平之處據實覆奏勿  
稍含混又據陸有仁奏請於河南藩庫借撥銀三  
十萬兩已另降旨諭知吳熊光卽照所請撥往應

用朕於軍營餉項從未有所靳惜每有先期籌畫  
不待伊等奏請預行撥給今陝省又添此項餉銀  
軍儲極爲允裕尙復何所藉口耶

欽定剿平三省邪匪方略正編卷二百二十六

庚申年

十二月二十三日

辛未

倭什布奏言竊

臣

因接長

齡來字以糧餉急需接濟當令副將吉林泰管

帶官兵自北而南與長齡明亮孫清元等南北

夾擊遏截賊匪東竄

臣

暫駐竹山督辦糧餉連

日查知高二一股賊數不多而散漫四竄長齡

等由重馬二坪百福頭取道兜截與山當陽遠



安等處山徑迂迴糧運間有遲滯查卽局存糧  
無多襄江水淺挽運爲難

臣

飛飭沿途地方官

加雇絳夫勒限催趲先因下游已運之米到襄  
尙須換載恐難接濟并飭碾動襄陽縣倉穀水  
陸並運以期源源接濟現在陸續趕運無悞餉  
銀一項已飭省襄二局速撥趕解無虞缺乏至  
吉林泰等長齡以其兵力稍單派同鎮臣孫清

元帶領襄宜兵丁及二竹練勇並撥馬隊四百五十名由陳家舖秦口逼賊西向茲據孫清元來字初八日探知徐逆賊股屯聚隆須垭一帶初九日五鼓進兵高塘河卽見隆須垭有賊二三百名搖旗吶喊吉林泰及叅將烏爾卿額遊擊蘇法那帶兵奮力搶上乘勢壓下賊匪分爲二股一向漳洛河一向左山梁逃竄吉林泰等

率兵順溝追擊遊擊全祿緊追左山梁一股該  
鎮帶同遊擊三福守備郭朝鳴帶兵搶上隆頰  
埡詎後路紅蓮洞兩河口有賊五六百名突出  
抄截隨營試用知縣金克俊卽同竹谿練勇首  
領鄭光明等奮勇追擊該鎮與總管托爾托保  
侍衛武成額及將備等帶領馬步官兵馳往壓  
擊鎗箭齊發賊始敗退追趕十餘里該匪等逃

向馬湖嶺一帶南竄時已昏暮未便窮追計共斃賊一百餘名惟金克俊身先遇敵衝入賊隊連殺二賊身受矛傷墜馬陣亡查長齡明亮之兵已抵玉口現在探蹤進剿復莊長齡抄寄摺稿內稱訊據獲犯張尙力等供黃號樊人傑並僞元帥張秦劉崔四姓有四五千人由化龍山繞至蓮花山跟著徐添德一股進來初三日在

八寶溝與青號合營等語臣查黃號樊人傑卽

係經畧額勒登保剿辦之賊先據桃花山卡守

備金洪翮稟報十一月二十七日探有賊匪由

化龍山竄入竹溪河等語該二處均係陝省所

屬並非楚境但恐或有分股竄入情事當經分

飭查覆去後茲據藩司溫承惠及邊卡地方員

弁稟覆實無樊逆竄楚之事其爲賊匪混供無

疑又據鄖西縣知縣孔繼梓稟報阮文潮張世  
龍等逆於初九日由魚洞河九龍臺西竄其樊  
人傑一股仍在山陽西北二峪河一帶滋擾等  
語查各該處俱與該縣邊界毗連隨經飛催副  
將滿倉帶兵星馳前往並飭糧儲道恒慶協力  
防堵以杜竄逸其高二馬五賊股已竄川陝交  
界之涪河腦等處距楚稍遠新任督臣書麟已

於初六日抵襄日內即可會晤俟面商籌佈妥協再行具奏奏入

上命軍機大臣傳諭書麟姜晟倭什布長齡曰徐添德一股賊匪屯聚隆須垭地方經孫清元帶兵追擊斃賊不過一百餘名不足爲慰前據長齡奏樊人傑及張秦劉崔四姓四五千入竄至楚省人數較多朕心甚爲厯念今據倭什布查明係獲賊混

供並無其事是楚省賊匪祇有徐高兩股又經官兵屢次剿殺所剩無多若能在楚界奮力剿淨卽屬伊等之功萬不得已亦當將賊匪逼往川陝斷不可令其在楚境奔竄現在四川團勇築堡之事極爲妥協賊匪無從搶掠陝省雖亦有堡寨不能如川省之認真且該處本年收成歉薄米糧短少賊匪艱於覓食不能在彼久住是以蓄意竄往楚



省是湖北堵剿之事較之川陝更爲緊要此時若將徐馬二逆驅逼出境其各處邊隘必當嚴密守禦斷不可使賊匪再有闖入楚省築堡之事雖較他省爲難亦已緩不濟急而團練鄉勇協助官兵則係目前急務書麟向來辦事可靠務須會同倭什布督飭各州縣多添練勇加意嚴防以期賊蹤遠絕至軍行糧隨刻不可緩稍有缺乏安能使官

兵等枵腹從事朕不待奏請先令截留粵餉二十萬兩昨又於山東江西兩處撥銀四十萬兩前此書麟又截留江西運陝兵米一萬石是該處糧餉已屬充裕姜晟係留楚專辦糧餉之員況湖北中晚二稻收成七分有餘米價自屬平減所有各軍營應需糧石卽著姜晟趕緊採買設法轉運俾得源源接濟士馬飽騰剋期蒞事所有受傷陣亡之

試用知縣金克俊著咨部照知州例賜卹

二十四日

壬申

德楞泰奏言竊

臣

於初十日在南

江縣屬乾溪口與勒保會合後

臣

帶兵卽由廣

元之野人村寶石溝一路探蹤前進途次板倉

溝據探哨兵勇先後拿獲賊探苟國玉何青等

七人解送來營訊據供稱係東朝觀張士龍辛

聰魏棒棒顏勝可阮正潮並楊李等餘匪各首

逆差遣出來探聽官兵信息當卽概行正法十四日午後趕抵鹽井河據探報該匪等現在波羅溝崖房溝黃石板龔家灣等處攻圍各峒

臣

當卽帶兵由青堦口翻山進剿該處樹木叢雜道路陡險又兼冰雪滑溜馬不能行遙見煙焰騰空賊衆在各溝內薰燒火勢正熾已攻破王家洞風斗巖灰朶子三洞卽令步兵鑽林越箐

分投競進該逆等尙未知覺官兵出其不意分  
撲剿殺賊衆登時潰亂當卽殲斃二百餘名生  
擒韓有元等七十八名餘賊奔上大埡口山頂  
恃險抗拒飛石如雨兵勇冒石仰攻不能卽時  
搶上臣查看山勢一路攻撲萬難得手一面另  
派奮勇兵勇繞出山後小路攀援而上賊見我  
兵從後抄來大形驚慌仰攻之兵乘勢飛奔搶

上山頂賊卽潰散兩面官兵極力痛剿又殺賊二百餘名生擒向正孔李貴等一百十二名滾崖者亦多我兵緊跟追殺三十餘里又令兵勇喊叫被擄難民投出免死若不早逃大兵趕上一概誅戮當有投出難民馮光林許氏等三百二十三名口餘賊悉向嚴家壩母豬槽老林一帶遁逃奪獲衣物米糧牲畜等仍分給各硯難

民訊據活賊韓有元等供稱首逆係陳朝觀張士龍辛聰魏棒俸顏勝可阮正潮並李楊餘黨共有五六千人原想躲在川陝交界老山擄人出山不料官兵追進山來不及防備傷折甚多陳朝觀一股昨日在田家壩向李家壩前去等語查嚴家壩李家壩相距不遠該匪敗逃自必前往合夥當將韓有元等訊明分別辦理查此

一帶溝內共有十一硐攻破者止三硐其餘五  
家硐洛水硐响水硐趙家硐扶耳硐新廠鴛鴦  
硐野猪硐等俱得保全共救護難民男婦大小  
八百餘名口隨有硐首向真元高洪李連登等  
率領來營叩謝臣親加安慰曉以團練禦賊之  
法俱各歡欣感悅而去十六日臣卽由濫潦寨  
馬盤山一帶逼截賊卽折向東南奔逃途次接



據署巴州田文煦稟報初四日探得通巴交界  
灣栢樹地方有賊匪二百餘人向登閣寨一路  
滋擾該州會同把總陳安邦並吏目陳聲帶領  
武生何林樹馮兆緒等分路堵剿初六日賊匪  
攻圍登閣寨適陳安邦等帶領兵勇趕到賊匪  
疑是大兵捨命卽逃乘勢殺賊二十九名附近  
之樓臺寨寨首武生李如華王宗夏李玉蘭帶

練勇三百餘名將青林壩去路截住與陳安邦  
兩路夾擊又殺賊五十一名投出吳敬相王夏  
氏等四十七名口獲馬九匹餘匪向陳家壩遁  
去旋於山林茨蓬內搜獲身穿紫色馬褂賊犯  
一名當經衆難民指認係李炳營內總兵張以  
文訊據該犯供認在賊營當總兵屬實前在觀  
音河等處被大兵殺敗我帶二百餘人逃到新

場又被團勇刦營今日帶人想去破登閣寨冀  
得衣物糧食不想遇見官兵我人少抵敵不住  
上山躲藏被搜山人拿獲等語當卽批令該州  
於該處將張以文臬割示衆各獲犯訊明分別  
辦理並令將出力之寨首練勇人等酌量獎  
一面鼓勵各寨團勇務將餘匪搜除淨盡不留  
遺孽惟查川北現在賊匪約共不過四五千

忽分忽合俱游奕於川陝交界之廣南等處老山之內其邊界地勢南北寬有百餘里二百餘里不等東西綿長千數百里雖係老山米穀稀少而包穀菽豆各種雜糧並牛猪實多各股賊匪往往被剿窮蹙所剩無幾卽竄踞其間肆其擄掠若不卽行剿辦日久復成大股且賊匪畏兵不卽出山官兵又恐逼賊入陝是以亦不進

山剿辦彼此觀望歲事無期又查陝境邊界卡  
隘現經長麟慶成佈置嚴密常有竄近之賊俱  
經擊回諒此數股敗殘餘匪斷不能衝卡越渡  
提臣七十五前經臣奏明令其於廣元三家壩  
由西北前進與臣兩面夾擊至今尙未到來頃  
據來信伊恐帶兵突入逼賊入陝難當其咎等

語臣現在欽奉

諭旨帶兵赴陝楚剿辦南岸各逆此間賊匪不能兼

顧查七十五原帶兵勇五千名續經臣撥添四

川官兵一千名現在共帶兵勇六千餘員各以

之剿辦自可得力臣現又飛行稜調令其帶兵

探明賊蹤星速進剿萬不可令賊匪又復蔓延

爲患至勒保現在川東雲開一帶剿辦金竹坪

竄來股匪並零星散逃之賊是否卽能分身北

來勒保自能權其緩急辦理再固原提督賽沖

阿向隨臣一路帶兵剿賊刻下已入陝界查固

原提督印信現經慶成署理會同長麟辦理沿

江一帶防堵事宜慶成於陝省地勢情形較爲

熟悉此時若將印信交出於防堵一切必致呼

應不靈賽沖阿平日帶領吉林官兵衆心極爲

悅服打仗甚屬奮勇現當剿賊喫緊之際一易

生手竊恐兩無裨益應請仍令賽冲阿帶領吉

林官兵隨同臣前往剿賊俾得易於集事奏入

上命軍機大臣傳諭德楞泰勒保七十五曰此次賊

匪陳朝觀張士龍辛聰等攻圍各碉經德楞泰率

領官兵前往奮擊共計殲擒賊匪六百餘名又投

出難民三百餘人所辦尙好但所稱欽奉諭旨帶

兵赴陝楚剿辦南岸各逆令七十五帶兵進剿一



節殊增厯慮前因川省祇有零星摸樁賊匪勒保  
七十五足資搜捕而陝省漢江南岸一帶賊數較  
多額勒登保又前往漢江北岸是以令德楞泰帶  
兵赴陝察看何處緊要卽往何處剿辦嗣又因陝  
省賊股分路折竄川境卽降旨令德楞泰不必前  
赴陝境今據奏稱陳張辛魏顏阮各逆餘匪尙有  
四五千人在南江等處老山遊奕而川東雲開一

帶又有金竹坪竄來股匪並零星散逃之賊勒保  
是否卽能剿盡尙未可定與前此情形迥不相同  
本年春間德楞泰與額勒登保先後赴甘將川省  
剿賊之事委之魁倫以致老林藏匿之賊乘間突  
出搶越嘉陵江使川西完善之區頓遭蹂躪德楞  
泰寧不知之茲德楞泰帶兵赴陝其川北賊匪僅  
交七十五剿辦且七十五尙未帶兵前來尙賊匪

聞知復思乘間渡嘉陵江則德楞泰又如前此之  
額勒登保而七十五不又成魁倫耶雖係朕過慮  
及此然不可不深思熟計莫蹈覆轍爲要此時德  
楞泰業已赴陝距川境邊界不遠亦不必復行轉  
回但總須兼顧川省方於大局有裨伊係叅贊大  
臣在川在陝豈可稍分畛域德楞泰若能將漢江  
南岸賊匪立時剿盡固屬甚善否則仍須逼歸川

境以便併力剿辦斷不可再令漢江南岸之賊逼  
歸北岸及東竄湖北地方此爲最要至所稱七十  
五至今尙未到來頃接伊來信恐其帶兵深入逼  
賊入陝等語實不成話七十五旣帶兵剿賊自應  
奮力兜截豈有竟置不辦之理且七十五旣慮賊  
匪入陝身懼重咎獨不慮其在川省到處蔓延獲  
咎更大乎實不知該提督是何居心七十五著傳

旨嚴行申飭現在德楞泰旣已赴陝所有陳張辛  
魏顏阮等股賊匪著責成七十五進兵搜剿伊現  
帶兵勇五千名德楞泰又添撥四川官兵一千名  
軍威不爲不壯務當實力剿辦悉數殲擒若再有  
稽延致老林藏匿賊匪竄出或逼往峽境或竄越  
嘉陵江七十五恐不能當其罪也又據奏勒保現  
在川東雲開一帶剿辦金竹坪竄來股匪並零星

逃散之賊等語勒保在雲開剿辦之賊究係何股  
賊匪是否業已辦竣尙未見伊具奏勒保係該省  
總督軍務情形自應通盤籌畫而防堵嘉陵江尤  
關緊要勒保仍須督飭防江之總兵許文謨副將  
趙得功及沿江道府各員加意防範不可稍有疎  
懈勒保一俟將川東賊匪上緊剿盡卽回川北與  
七十五會合進擊老林竄匿之賊以期肅清川境

至所稱彼此觀望歲事無期之語爲五年以來之  
通病若伊等果能無分彼此併力一心賊匪早應  
殄滅何至遲至此日尙未歲功現在已交春令若  
似此數日奏報一次殺賊數百名並未除一首逆  
殲淨一股不過再有數報已至春深彼時青苗在  
地賊匪又得掠食飽颺而一交夏秋伊等又得以  
暑熱雨不能進剿賊匪爲詞何時始能辦竣現

距釋服之期祇有九十餘日朕盼望軍營歲績宵  
旰靡寧伊等具有天良豈竟與賊日久相持不思  
滅此朝食德楞泰在軍營日久勒保兩任川督於  
該處賊情皆所深悉究尙有何策可以速平賊匪  
接奉此旨後著將如何設法佈置於春間一律辦  
竣之處據實迅速覆奏勿稍支飾其奏請令賽沖  
阿帶領吉林官兵一節自應如此辦理



同日

上命軍機大臣傳諭四川陝甘湖北各督撫曰川陝楚各路軍營剿辦教匪已閱五年之久尙未蕝功朕心日深焦廑在經畧額勒登保叅贊德楞泰及帶兵大員如慶成明亮等皆受

皇考厚恩朕復委以軍務重任伊等往來剿捕實亦不遺餘力此等敗竄匪徒久應殄滅而仍前西竄東

奔漫無攔截者總緣地方官不能實力堵禦所致  
節經降旨飭諭該督撫嚴飭各府州縣認真團勇  
防守不啻至再至三乃近日各股賊匪又復四散  
竄擾可見伊等總未能實力奉行再帶兵大員等  
隨賊所向奮力兜剿鞠躬盡瘁雖屬分所當然究  
於剿賊大局何益且官兵往來追擊日久卽精銳  
皆成疲乏現當剿捕萬緊之際豈可仍聽地方官

泄洩省省不亟思設法籌辦乎向來賊匪經過之處州縣官往往以保護城池爲名閉門自守而鎮市村莊任賊焚毀以致賊匪恣意搶掠裘脅日多雖經帶兵大員節次痛殲餘賊無幾不數日各處裘脅又成大股與未經剿殺無異此時惟有責成該督撫令各府州縣認真團勇保護村莊使賊匪無從搶掠方爲上策如地方文武果能認真防守

賊匪竄近之時親率兵勇出城奮力堵截不使滋  
擾村莊俾居民得以安堵無虞卽將該地方官據  
實保奏朕必優加獎擢倘一聞賊至心存畏怯閉  
城自守致賊匪將城外村莊肆行焚劫必當查出  
指名嚴叅治罪但團勇禦賊必須強幹有爲素得  
民心之員始能得力著各督撫將賊匪往來滋擾  
地方如川省之廣元蒼溪儀隴營山達州新寧開

縣萬縣雲陽大寧太平東鄉巴州通江南江陝西  
之鳳縣留壩褒城沔縣寧羌南鄭城固洋縣西鄉  
石泉紫陽漢陰洵陽安康平利白河五郎鎮安山  
陽商州孝義盩厔湖北之鄖西鄖縣竹谿竹山歸  
州興山東湖遠安保康房縣均州穀城現在各州  
縣詳加查核其中實能勝任者卽責令團練守禦  
若不能勝任者卽行撤回另選幹員奏調如不敷

更調亦當奏請揀發再於道府大員內如楊蔭元  
福方積等派令親往分管各州縣團勇事宜以專  
責成而督撫大吏並當合力同心大加振作以期  
迅速蕲事並著山出示曉諭川陝楚百姓以教匪滋  
事以來蹂躪地方擄掠男婦殘忍迫脅無所不至  
朝廷憐憫爾等慘遭荼毒徵兵撥餉於今五年爾  
等各具身家豈有不思自衛任賊殘破之理倘經

賊匪闖入爾等廬舍室家皆不能自保且被賊匪  
累脅後一遇官兵追剿賊匪卽令爾等在前迎拒  
必致玉石不分身罹鋒鏑何如悉力團勇賊至奮  
力堵禦賊去則仍安業卽如近日川省寨首陳朝  
會鎗傷首逆鮮大川賞給七品頂戴藍翎團勇彭  
朝祿盤獲賊首張子聰賞給六品頂戴爾等如能  
似此殲擒逆首卽當保奏格外加恩給予官職翎

頂卽不能殲擒賊首而悉力捍衛俾賊匪無從搶掠亦必優加賞賚旣可受朝廷獎勵之恩又得免鄉閭殘燬之患豈不公私兩得乎如此愷切曉諭庶可收衆志成城之效書麟甫經到楚正資整頓至勒保長麟陸有仁倭什布等皆簡任封圻務遵節降諭旨認真妥辦仍各將如何籌辦之處先行具奏倘仍前怠玩並不實力奉行或僅以空言覆



奏塞責而稽蔽事必將伊等從重治罪悔何及矣

臣等謹案團勇禦賊之方固在民間自爲衛

護而尤賴忠信之長慈惠之師能督率而鼓勵之我

皇上厯念瘡痍節經

申諭督撫飭屬各固圉認真防守而潰殘餘匪猶得肆竄奔馳謂非地方官之奉行不力而何

茲特蒙

聖明訓示將川陝楚各州縣要隘一一如指諸掌並  
於現任道府中擇其尤者以爲矜式

諭令督撫率同經理大加振作且又曉諭閭閻優其  
獎拔

綸言渥沛至再至三感人心而迓

天和是以疾風掃蕩之勛收效於影響也

二十六日甲戌書麟奏言竊臣昨到襄陽將兵糧

等項漏夜查明設法辦理卽趕緊起程探聞撫

臣倭什布在竹山一帶剿賊臣不及從均州卽

陽大路行走卽由花果園一路併站遡進沿途

屢被賊擾村市半成瓦礫灰燼情形極爲可慘

聞有人煙稍密處所俱已築堡自衛亦有於山

嶺豎立寨柵一聞賊警搬入據守者臣當卽徑

加慰諭察看情形居民均知激勵衆志相安因  
思賊匪屢經剿敗卒未剪除每遇村莊無非掠  
食裹人爲伎倆而深山荒谷中勢不能處處安  
設兵勇莫若令場集之較大者一律築立堡寨  
人口糧食收貯其內其附近零星村落遇急一  
併歸入在居民各護身家自必志堅立集而賊  
匪無從焚掠官兵截剿亦復易於得手

臣當卽

通飭被擾各屬及未經蹂躪之區一體趕辦並  
派委妥員分投勸諭酌量興修使之守望相助  
似亦備賊之一法臣於十五日馳抵竹山軍營  
會同倭什布將本境剿堵事宜悉心籌畫竊思  
楚北軍興五載軍威不爲不盛

發帑不爲不多卽帶兵各員無不切齒同仇力圖剿  
洗而賊匪奔逸靡常卽以楚境而論時而肅清

時而竄擾

臣

查閱形勢湖北邊境與川省毗連

之處綿長二千數百里俱係危峯仄徑路路可  
通卽掘濠塹以斷賊蹤只可偶一施之亦非長  
策現除守卡兵勇外統計在營打仗兵丁六千  
數百餘名加以打仗練勇三千餘名賊退則派  
防邊卡賊至則酌調從征此項官兵大半久在  
戎行日攀涉於懸崖絕澗中衝冒風寒暑濕卽

有勁兵漸成疲卒

臣

與倭什布再四熟籌俟賊

退而堵之使不得入先應賊來而剿之使不得

出卽有乘間踵至賊匪亦有聞風裹足不敢再

萌窺伺之心昨據駐守黃龍灘之廣西右江鎮

總兵德昌稟稱本年五月調來兩粵兵三千五

百名從征至今除陣傷亡故及殘廢遣回六七

百名外尙存兵二千七八百名現在帶駐黃龍

灘兵六百餘名精壯者僅十之五六若不更調  
補額兵力更缺查廣西右江鎮所屬鎮安協隆  
林營二處兵前曾跟隨打仗頗爲奮勇又係生  
長山谷登陟趨捷請調鎮安協兵三百名隆林  
營兵三百名來楚隨剿至該二處存營兵丁亦  
足資本地操防等語所稟自係實情若不准其  
抽換勢必日用日疲有名無實徒然耗費鹽糧



臣當卽會同倭什布飛咨粵省抽撥更替於軍

務庶有裨益頃據竹山縣探報徐高二股賊匪  
在葛藤口及大小西河一帶滋擾孫清元吉林  
泰由鮪魚口抄剿長齡明亮由郭家洲進剿等  
因臣訪察賊勢似欲隨擾隨竄使官軍跟蹤剿  
捕不得休息其兇狡情形可恨已極臣思川陝  
楚三省邊界犬牙相錯在賊匪從支峯蔓壑人

跡不到之處東奔西走並不知爲何省疆界若不併力合剿仍復耽延時日刻下剿捕事宜

臣

斷不稍存此疆彼界之見逼賊竄出楚境塞責

一時苟安旦夕現與倭什布確探賊蹤相度機

宜或分路兜擒或合營會剿剿賊而賊退則剿

卽是堵堵賊而賊至則堵卽是剿

臣受

恩深重目擊居民殘敝賊蹤出沒各情形焦灼如焚

寢食俱廢惟有殫竭衰庸會籌剿堵但願軍務  
早完一日早紓一日

宵旰憂勤

同日長齡奏言竊臣等前因黃藍青號三股匪

衆先後闖入楚境馳抵房縣之蒙古寺督率馬

步兵勇奮力截殺直抵秦口該匪不敢東竄折

回西北隨即跟蹤前進臣於初七日馳抵三教

堂接莊倭什布知會暫駐竹山督辦後路糧餉

派令副將吉林泰帶領兩粵官兵來至陳家鋪

攔截東竄之路

臣

查徐添德爲著名首逆兼有

高二合夥又有黃號匪徒人數稍衆自應慎重

辦理吉林泰現有之兵究屬單薄況此股賊匪

素來詭譎亦非一路兵力所能剿辦

臣

與明亮

孫清元等熟爲籌商當將吉林泰帶來兵勇及

臣現帶官兵均勻調撥襄宜兩鎮官兵一千八

百餘名二竹練勇二千名馬隊四百五十名卽

令孫清元統領與吉林泰合爲一路卽由西南

漳洛河官渡一帶截剿

臣

與明亮將原帶兵勇

由西北一帶兜迎兩路並進逼歸一處以期易

於得手旋據探報該匪仍分三股青號一股向

泉溪行走黃號一股向黃柏溪行走藍號一股

向火燒坪前竄均在竹谿境內復據孫清元來  
信初九日正在帶兵前進遇賊二三百名吶喊  
抗拒當卽督同吉林泰及將備等搶上山梁截  
殺又報後路紅蓮洞兩河口有賊五六百名突  
出抄襲我兵之後隨營候補知縣金克俊帶領  
練勇鄭光明等奮勇迎擊侍衛托爾托保遊擊  
毛秉剛守備郭朝鳴帶領馬步官兵馳前接應

擊斃賊匪一百餘名追至舊家山地方該匪恃  
險撲壓知縣金克俊督率鄉勇首先衝入斃賊  
數名身帶重傷當時陣亡各官兵憤恨衝擊該  
匪始由馬湖嶺敗竄臣連日知會孫清元兩路  
緊躡不予以暇於十五日探得該匪仍復會合  
屯聚麻家壩和合埡泉溪一帶卽星飛知會孫  
清元自西南而東北臣等自東北而西南以成

兩面夾擊之勢卽於十六日五鼓兩路官兵約會前進行抵太平關卽聞鎗礮之聲計料孫清元兵勇業已接仗

臣

長齡帶領塔津保呢瑪善

朱士奉等

臣

明亮帶領富翰雙福王懋賞等分

帶馬步兵勇等兩路疾馳趕至瓦房口該匪正

在攻撲該地寨砦並於山梁排立賊衆據險抗

拒

臣

長齡督率兵勇於左邊山梁仰攻

臣

明亮



帶領馬隊直搶右邊山梁該處山勢頗高路徑  
尙寬撲壓數次兵勇毫不退動愈撲愈進箭射  
鎗擊立斃賊匪二百餘名餘匪俱向大山翻越  
節次俱有賊匪埋伏接應臣等遠用大礮轟擊  
馬兵分路馳射步兵鎗矛到處無不應聲而倒  
復斃賊四百餘名連壓四重山梁該匪直往西  
竄又據探報孫清元同侍衛托爾托保武承額

帶領勁旅副將吉林泰督同將備等帶領奮勇  
兵丁三路追剿該匪不敢西向仍復折回北竄

臣等兩路夾擊復斃賊匪四百餘名生擒活賊

六十一名搶獲騾馬旗幟鎗矛甚多賊衆身帶  
鎗矛各傷滾巖跌斃者甚衆被擄良民分投逃  
出者不計其數餘匪不擇路徑亡命奔逃我兵  
自五鼓進剿馳逐十數重山梁追殺六十餘里

已盡竟日之力當於雙竹園泉溪等處分隊暫  
爲歇息並令兵勇分投查驗被殺賊匪之內有  
無首逆並訊獲犯王世貴蔡元希周大經周開  
吉等十八名供稱俱係鎗手頭目青號一股是  
徐添德大掌櫃元帥張允壽管事前日與藍號  
合夥卽高家營掌櫃高二後來趕上黃號元帥  
叫樊榮華是黃號樊人傑一家樊人傑尙在陝

西並未過來三營合夥有一萬餘人沿途掳脅  
又有四五千人原商量要往竹山奔黃龍灘下  
均穀襄陽過年連日官兵跟追甚緊存紮不住  
要想覓路逃往川陝不料今日兩路官兵抄來  
殺傷甚多我們掌櫃元帥不知下落亦不知向  
何路逃走等語當將該犯等臠割其餘陳理等  
四十三名俱係被擄良民卽行釋放所獲馬騾

鎗矛當卽賞給兵勇此次打仗兵勇內間有損  
傷容俟查明咨部辦理臣等仍與孫清元兵分  
兩路偵探該匪分合趨向乘勝剿除以期仰慰  
聖廑均奏入

上命軍機大臣傳諭書麟倭什布長齡曰書麟甫到  
軍營卽以防堵爲重所見已得要領其勸諭居民  
築立堡寨及更替疲兵等事均於軍務有裨摺內

所稱無分疆界併力合擊等語深得大臣之體覽  
奏甚爲嘉慰特賞給御書福字俾書麟與員弁兵  
民等共迓春祺大功速成正在降旨間又遞到長  
齡奏報連日分道抄截青黃藍三股賊匪共計殲  
擒一千二百餘名大獲勝仗欣慰覽之此次長齡  
明亮分帶塔津保富翰等督率兵弁兩路疾馳趕  
至瓦房口賊匪正在攻撲寨砦據險抗拒長齡督

率兵勇仰攻左邊山梁明亮帶領馬隊直搶右邊  
山梁立斃賊匪多名孫清元同侍衛托爾托保武  
承額副將吉林泰督率弁兵與長齡明亮會合夾  
擊多有斬獲當此嚴冬歲暮涉厯冰雪均屬奮勇  
出力長齡著賞給大小荷包鑲瑪瑙方盒孫清元  
著賞給大小荷包並著交部議敘明亮著陞爲二  
等侍衛並賞給大小荷包以示獎勵又發去搬指

搬指套各十個交長齡等分賞軍營出力各將弁  
其餘隨同打仗出力將領如塔津保富翰托爾托  
保吉林泰等並著書麟會同長齡孫清元明亮等  
查明具奏候朕加恩至兵丁等衝寒涉險奮勇殺  
賊實堪嘉獎前有旨賞銀一萬兩爲兵丁添製衣  
履之用此次出力兵丁著書麟查明再提銀五千  
兩分賞用示鼓勵湖北青黃藍三股賊匪聚脅多



人本欲往均穀襄陽一帶過年實爲可恨今經長齡等痛加殲戮賊匪自己喪胆現在長齡明亮與孫清元分兵兩路偵探該匪趨向進剿而書麟倭什布已親往策應徐添德係起事首逆高二叉係賊中最兇悍者書麟卽當督同長齡等乘此兵威勝勢將高徐二逆卽在楚境一鼓殲除勿留餘孽至明亮前在金川曾與書麟共事今同在楚省辦

賊書麟自應勸令加倍奮勉以期補過桑榆若能  
將楚省之賊剿盡此卽伊等大功捷書一至朕必  
立沛殊恩倘一時未能殲淨或竄往川陝地方長  
齡明亮自當帶領勁兵隨賊所向緊躡追剿書麟  
係湖廣總督自應與倭什布孫清元仍駐楚省督  
辦防守事宜在該督素矢忠勤當此剿賊緊要之  
時自必思滅此朝食但職任封圻如果賊匪已竄

往川陝斷不必越境追賊惟賊匪竄出楚境後所  
有該省毗連川陝各邊隘務須督率地方文武扼  
要守禦使賊匪無隙可乘不致再有一名闖入卽  
爲不負委任又書麟奏前赴竹山經過地方人烟  
稠密之處俱已築堡自守正可廣爲勸諭使百姓  
咸知自衛各保身家並綏撫良民堅心禦賊以收  
衆志成城之效至現在楚省糧餉雖交姜晟辦理

倭什布係本省巡撫亦當隨時照料不可稍有貽  
悞

二十七日<sup>乙亥</sup>勒保奏言竊<sup>臣</sup>前在川北各境內

因據開縣雲陽等處稟報有不知姓名賊匪由

大寧金竹坪老林竄出當與德楞泰會商三路

重兵俱在川北必須分兵兼顧川東是以<sup>臣</sup>卽

自南江之乾溪口帶兵轉回徑赴川東探賊迎

剿查川省各股賊匪每逢官兵痛殲一仗必有零星四竄之賊潛匿奔逃緣大兵不能久駐窮搜一經追賊遠去該匪等或百餘人或數十人湊集摸樁民間猝不及防頗受其害節經臣等

通飭地方文武並派將弁等帶領兵勇查拿以

免日久滋蔓茲臣帶兵轉回據署巴州田文煦

稟報先因登高寨團勇將李炳股內賊日張以

文之妻喻氏擒縛解營張以文於初六日晚間  
率領夥匪百餘人至寨索討聲稱如不給還喻  
氏必攻撲報仇正在抵敵間適把總陳安邦吏  
目吳壽帶領兵勇於次日趕到匪衆一見疑係  
大隊官兵到來卽紛紛潰逃我兵乘勢追殺斃  
賊二十九名追至樓臺寨復經該處團首李如  
華何林樹李玉蘭等率領練勇堵住與陳安邦

等兩面截殺斃賊五十一名投出吳敬朝等四十七名賊目張以文鑽入茨林卽時擒獲訊據該犯供稱與冉文儔同時起事現在李炳名下當僞先鋒因在觀音河被官兵殺散路過登高寨又被寨勇將妻喻氏拏去探知大兵已赴南江特帶百餘人前來報復不意被擒等語當經臣飭令巴州將該犯解至軍營訊明凌遲處死

所有出力之員弁寨長人等均各酌加賞賚以  
示鼓勵又據渠縣大竹稟報自官兵於安仁溪  
痛殲大夥匪衆旋有七八十人晝伏夜行摸樁  
擄掠經該二縣團勇追捕殺賊十餘人餘匪逃  
至梁山縣栢林漕地方潛匿

臣

一面批飭嚴拏

一面派令遊擊桂涵酌帶兵勇馳往搜捕以期

淨絕根株又

臣

前赴川北剿賊之時據太平縣



稟報該縣井溪壩一帶山內有摸樁賊一百餘人不時出沒當經派令都司楊春榮縣丞周一鳴帶領兵勇前往剿辦茲據該都司等稟報初十日探知賊在老雄灣屯紮卽分兵由流水溝相思潭兩路進剿該匪等始猶抗拒嗣見兵勇勢盛卽捨命奔逃追殺四十餘里斃賊五十餘名並殺死戴水晶頂賊目一名於該犯身上搜

獲瀘寧營守備鈴記一顆生擒旗手鄧朝仲等  
並逃出難民男婦蔣義富等七十二名口訊據  
供稱此係湯思蛟夥內掌櫃李老七爲首卽此  
次殺死戴水晶頂之賊瀘寧營守備鈴記乃李  
老七從前打仗時所搶獲者自九月間在紫水  
壩地方被官兵打散李老七帶同鄧朝仲等百  
餘人在太平西鄉邊境老林藏匿近聞官兵俱

赴川北所以出來摸樁不料盡被擒殺等語

臣

已批令將現獲各犯交與太平縣錄取確供稟請分別核辦是巴州太平境內兩股摸樁之賊業已辦完惟梁萬境內尚有數十人未淨已催令遊擊桂涵帶兵緊追斷不任其稍留餘孽致有蔓延至大寧金竹坪之賊據報係白號湯姓藍號岳姓共有千餘賊衆分有一二百人在雲

開境內擄糧經該處團勇擊退仍向金竹坪屯  
踞查臣於初十日由南江乾溪口起身至金竹

坪計程一千四百餘里於十七日行抵新寧距  
大寧尚有六百餘里探得賊匪仍在該處游奕  
並未出山當卽督同阿哈保薛大烈永寧帶兵  
兼程前進相機剿辦以期剋日掃除再太平城  
口一路現據總兵托雲泰稟報並無賊匪竄入

探聞龍紹周等股均在陝西安康屬之泊河漳

河一帶屯紮臣飭令該鎮祇須攔住老林要路

如有賊匪由陝竄來逼令歸入開太境內平坦

地方庶剿辦更易得手又松潘龍安一帶本派

高廉鎮總兵張志林督率防堵今新任松潘鎮

呂朝龍昨由裏塘查辦夷務事竣回營現聞伍

逆餘黨又從陝西竄入甘境所有松龍邊隘防

守極關緊要臣已飭該鎮速回松潘本任督率

兵番實力堵禦以期呼應更靈並札飭張志林  
俟呂朝龍到任後卽赴白水嘉陵江一帶督辦  
防江事宜用資得力奏入

上命軍機大臣傳諭勒保曰已州太平境內兩股摸  
樁之賊經該處團勇等分投追捕兩處殺賊二百  
餘名搜剿完竣所辦尙好至大寧金竹坪一帶尙

有白號湯姓藍號岳姓賊匪湯姓自卽係湯思蛟  
其岳姓又係何股賊匪旣據奏該匪等祇有千餘  
且在雲開境內搗掠時該處鄉勇卽能擊退可見  
賊匪無他伎倆易於剿捕此時李炳陳朝觀張士  
龍及辛聰顏勝一司魏棒棒阮正潮等各逆俱在川  
北奔竄股數較多於川東而德楞泰已帶兵赴陝  
勘保自尙未經知悉若因川東零星小股牽綴我

兵致川北大股或有蔓延轉墮賊計且川北各股  
賊匪僅交七十五一人在彼剿辦恐不可恃勒保  
應察看賊情如大寧竄匪人數無多無需勒保自  
行督剿卽於阿哈保薛大烈永寧三人內酌派一  
二員在彼帶兵搜捕務期淨盡勒保仍回至川北  
率同七十五併力擊剿將川北大股賊匪迅速殲  
除方不至顧此失彼並須督飭鎮將嚴防嘉陵江



岸不可稍涉大意其所奏探聞伍逆餘黨又從陝西竄入甘境尙未據額勒登保奏報所探情形如果確實想額勒登保自當卽日奏到其松潘龍安一帶邊隘勒保已飭令總兵呂朝龍速赴該處實力堵禦並令總兵張志林於呂朝龍到後卽赴白水嘉陵江督辦防江事宜惟當飭令該鎮等一體嚴密堵截毋使賊匪漏入爲要